



Tir Yimyim

www.tiryimim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimim@gmail.com

TAPAK 3

Mizoram-Myanmar bus service atema temelaba atadar: Lalnuntluanga

TAPAK 8

China nung makamait tia samaogo: Tir Xi Jinping

VOL. XVIII NO. 133 (ADOK 133) DIMAPUR

ROGONÜ (FRIDAY) TSÜKLAI (FEBRUARY) 26, 2021

₹ 5.00



Union Minister for Health & Family Welfare, Science and Technology and Earth Sciences, Dr. Harsh Vardhan o pa kinungtsü na February 25, 2021 nikongdang Dimapur tonga aruogo. Pa ya Dimapur Airport nung Nagaland Minister for Health & Family Welfare, Pangyu Phom; MP Tokheho Sema; Deputy Commissioner Dimapur, Rajesh Soundararajan IAS; Commissioner of Police Dimapur, Rothihu Tetseo IPS aser Medical department nungi ketdangsürtem den party worker temi agizüka liasü. Dimapur atongba sülen Union Minister-i CISHR (Referral Hospital) Dimapur semdangya yangji aliba ketdangsürtem den sensaksema liasü. Dr. Harsh Vardhan ya February 26, 2021 nü Mon-i aotsü aser yangji pai Medical College ka atema nungshilong azungtsüsü.

BJP Mkg District-i BJP Nagaland Tir teinyakdak melentsü mepishir

Mokokchung, February 25 (TYO): BJP Mokokchung district-i shidi ka ajanga BJP In-charge, Nagaland Nahil S. Kholi dang Nagaland nung, talisa Mokokchung district nung BJP jenjang tajungba akümtsü atema tekaraba nung tang teinyakdak BJP Nagaland Tir, Temjen Imna Along Longkumer melentsü mepishia metetdaksüogo, ta Brihostibarnü BJP Mokokchung District ketdangpurtemi sangdong ka ajanga metetdaksü.

"2020 küm nungi tenzüka BJP Nagaland state-i timtem kanga ajangshidar, aser ibaji tang teinyakdak BJP Tir, Temjen Imna Along Longkumer tamakok kar ajanga lir. Iba ya ajanga inyakyim ajak nung kongshir," ta BJP In-charge, Nagaland dangi züluba shidi nung shia lir.

2020 küm nungi tenzüka coronavirus wara mapang nung BJP Nagaland state lenisüba onük nung mangatettep adok aser BJP district den organizational officials timbakati BJP Nagaland state Tir teinyakdak melentsü takhangba agüja liasü.

BJP Mkg District-ia BJP Central office dang tekaraba nungi iba onük bentettsü mepishia liasü. Yamaji BJP Central office-i tiyongtsü aita onük bentettsüba atema pelar, ta sangdong nung shia lir. Ajisiüka tia makai iba teblemstsü ano mebentet, kechiyong Tir Imna Along Longkumer-i tang tashi Tir ka ama pai teinyaktsü mapatem meinyaker, aser ibaji ajanga state nung party inyakyim nung timtem agütsür, ta parnoki metetdaksü.

BJP Mkg district-i Feb. 22 nü senden ka mena iba onük nung o lemtepa sülen kuli kar nung

ajemdaker BJP Tir melentsü atema temepishiba shidi agütsüsüsa aküm, ta parnoki metetdaksü.

"PDA sorkar nung Cabinet Minister ka ama Temjen Imna Along Longkumer-i BJP Nagaland State Tir menden bona lir. Imna Along Longkumer ya PDA sorkar nunga Co-chair lir. State BJP Tir ka ama pa mapatem aser khuretem nung tetsükdaksü kanga adoker, kechiyong pa teinyaktsü mapatem jenti lir. State nung BJP ya ano meintet aser state nung party junga amenoktsü atema ano teinyaktsü jenti lir. Tesüiba küm ishika tsüngda BJP Nagaland tanem-tanemi indar aser state nung tongti party rongnung ka kümogo. Ajisiüka tang teinyakdak Tiri pa teinyaktsü mapatem meinyakba agi state nung BJP pur melung mastür," ta BJP Mkg district-i züluba shidi nung shia lir.

"Iba onük ya tekaraba nung mebentetra party jenjang mejungi kongshitsü ta onoki teblemstsü akar. Mokokchung district nung mandal 10 lir aser state nung tongtibang district rongnung ka lir. District nung BJP MLA ana lir aser district tesem ajaklen tera yangdar. BJP Mokokchung district-isa menden ajak nung takok angutsüpur BJP candidates toktepdaksütsü telemtetba agiogo. Ajisiüka iba teblemstsü onük ajanga taruba election atema nüboyimba tsütsü timtem ajangshir," ta shidi nung shia lir.

"Iba teblemstsü atema inyakra Nagaland nung BJP yangertsü. Anungji BJP ajungtsü atema nai iba teblemstsü bentettsü atema telemtetba agütsü mepishir," ta parnokisa metetdaksü.

NFHRCC jongdak senden ayonger

Dimapur, Tsüklai/February 25 (TYO): Governor's Liphanyan nung Doyang apu yanglua aliba dak sendakba nung tongtibang ken o kar sensak asemtsü atema February 27 (Honibarnü) 11:00 ako nungi tenzüka NFHRCC based Office, Kher Mahal Dimapur nung NFHRCC sendenden ka amentsü

ayongba züngsem ajak nem metetdaksüogo.

Anungji iba senden nung Tribal Committee züngsemtem ajak tamakok maludaktsüi aru adentsü atema metetdaksür, ta NFHRCC Convenor, Supu Jamir aser AGS, NFHRCC Chenithung Humtsoe nati külem sangdong ka ajanga metetdaksü.

Yimjiyimjung asoshi telungjem aser teyaritep nungdaker: Advisor Neikha

Kohima, Tsüklai/February 25 (TYO): Tebour tajung Naga Heritage village, Kisama nung Angami nungertemi par kin asoshi benjong tulutiba, Sekrenyi mungogo, kong Advisor, Youth Resources and Sports, Zale Neikha alakteta jaoker ama dena liasü.

Sekrenyi dang ya Phousanyi mesüra asüngtetba/müreketetba benjong ta ajar, koba Angami Public Organisation (APO) ajanga tuyuba ama Chakhro YO, Northern AYO, Southern AYO aser Western AYO den lungjemer Angami Youth Organisation (AYO) ajanga ayongzuka liasü.

Iba benjongmung nung jembiba mapang, Advisor Neikha-i Angami nung dang Naga nung loktiliba nung parnok jenjang asadangtsü ayongzük aser 2011 census nung Angami nung nütsüng yongsük lakh 2.68 lir aser Nagaland yimtiba kibur asütsü temoatsü lor saka state nung danga kin tulutem dang nungi aisü nung tesülen lir, ta ashi.

Sorkar indang department 90 jungnüa aliba nung Angami nung Administrative Heads of Departments ya department 9 shi nung lir aser Heads of Department

ya department 8 shi nung dang lir, Angami nungi indang indanga IAS shimteter nisung ka dang, IPS kata mali, NCS 32 shi aser NPS 18 lir, saka Tsüngrem taochi agi Neiphu Rio-i Chief Minister ama Naga nung len anir, ta Neikha-i ashi.

State yimtiba amenoka aliba district, Kohima madak kibur süaka Angami nung tang jenjang ya tesasatsüka lir, kechiaser danga kin ama masü, Angami nung kati ka meyariner aser ka temaba jejang nung ajungketba anema temetsüdaksü long ka ama akumer, ta Advisor Neikha-i ashi.

Anungji Angami nung lenirtem lungjema yariteptsü nungdaker aser ka temaba jenjang nung ajungkettsü asoshi yariteptsü tim, ta pai ashi.

Zünger aliba lanurtemi sorkar mapa kisüng bushiba atema sasasetta jembiba mapang, mapa inyaker ka mapa nungi anisüngzükba mesüra asüba ajanga dang mapa tazüng (vacancy) ya adoker ta asenoki angatetsüla, ta pai ashi.

Iba dak sendakba nung Naga nung asoshi tamendak dak ji aluyimba ya lir, anungji asenoki ibaji inyaksüla aser sorkar mapa

kisüng nung metaloka melie entrepreneurship aser business nunga tenük rangloksüla, ta Neikha-i ashi.

"Asenoki business ya mazünger atema amai bilemer, saka business tejakleni aotsü atema zünger alir dak shisatsü tajungba lir, aser kasa mapang lenirtem aser taintemi lanurtem dang mapa meinyaki melie business aser entrepreneurship nung tetsüng ajemoktsü ajungshitsüla," ta pai ashi.

Paisa, lanurtemi sobaliba aser yimsü-yimbong wazüka ayutsü nungdak aser taintemi itemji lanurtem nem angazükdaksütsüla, ta ashi.

"Khristan yimsü ya asenok tamang indang lir, anungji sobaliba aser yimsü-yimbong tajungtem ya asenoki mamadoktsüla," ta Neikha-isa ashi.

AYO tir Kekhrie Pfukha lenisüba kübok iba benjongmung tenzüka Kigwema Baptist Church nungi senior pastor Rev Mekhale Yhoshü-i sarasadem aser Pfuchazünuo, Kohima village ajanga tetsü-tebou ken ka aten. Iba Sekrenyie benjongmung ratet ya APO advisor Dr Vilhusa Seleyi-i agüja liasü.

COVID-19 Nagaland: Nisung 6 dak tashidak potetogo

Kohima, Tsüklai/February 25 (TYO): Nagaland nung anogo asem tashi nisung ka dak danga COVID-19 tashidak mepotetba sülen Brehostibarnü nisung trok dak tashidak poteta tashidak menar 12,198 jungogo, ta health ketdangser kati metetdaksü.

"Tanü nisung 6 dak COVID-19 tashidak potetogo. Kohima nung

5 aser Dimapur nung 1. Ano Dimapur nung COVID-19 agi shiranga alir ka anepogo," ta Minister for Health, S Pangnyu Phom-i tweet asü.

Tashidak menartem rongnung nisung 11,942 anepogo aser nisung 13 tang temang anepaludar, ta pai ashi.

"Bodhbarnü tashi nung state

recovery rate 97.94 per cent aliba tang 97.9 per cent kümogo," ta Director of Health and Family Welfare, Dr Denis Hangsing-i ashi.

Nagaland nung tang tashi nung sample 1,29,815 tendangogo, kong RT-PCR nung tendangba 74,690, TrueNat 37,336 aser Rapid Antigen Test ajanga tendangba 17,789 densema lir, ta paisa ashi.

PDA züngsemtemi Union Minister for Education Ramesh Pokhriyal den ajurutep



PDA züngsemtem-i Union Minister for Education Ramesh Pokhriyal den ajuruba noksa nung angur.

Dimapur, Tsüklai/February 25 (TYO): Minister for Higher Education & Tribal Affairs aser State BJP Tir Temjen Imnalong-i anir Nagaland Legislative züngsemtem rongnungi Minister for Housing & Mech Tongpang Ozukum, Advisor for IT & C,Sc & Tech and NRE Mmhonlumo Kikon, Advisor for Horticulture & Border Affair Mhathung Yanthan, aser Advisor for TE & Election Medo Yokha nungeri February 24 nü New Delhi nung Union Minister for Ministry of Education Govt. of India Ramesh Pokhriyal den par kidang ajurutepogo.

Lenirtemi National Educational

Policy tasenba atema Union Minister nem tenüngsang agütsü. Parnokisa State Higher Education & Technical Dept. indang inyakyim balala Union minister nem metetdaksüba den RUSA 2.0 kübok State nung Central scheme tem benoktsü asadangba atema Union Minister dang kanga pelaba lemsatepa liasü.

Kasa mapang nung parnoki RUSA 3.0 tashi taitba nung lepa reprangshiba atema Union Minister nem tenüngsang agütsü, koba Nagaland aser North East State tem atema tajangzük tulu asütsü.

Maneni lenirtemi RUSA 2.0 kübok state nung Professional

College of Horticulture ka aser NITTTTER ka amenoktsü atema mepeshi. Sensaksem mapang Minister Along-i, Nagaland & North East State temi timtem ajangshibatem indang lemsatep aser Union Minister dang scheme benoktsü atema tenem nung aliba state tem asadangtsü mepeshi.

Union Minister-i Nagaland nungi lenirtemi benokba onüktem ajak tenok tenoka anga aser RUSA Scheme takok ngua benokba atema state nem tenüngsang agütsü. Maneni Union Minister-i teka amteper inyaksü nangzükba den state nung Professional College of Horticulture aser NITTTTER amenoktsü atema mepeshiba asadangtsü, ta ashi.

Union Minister-isa, Scheme tajungtiba nung benoktsü atema temen nung aliba state tem asoshi guide line asadangshitsü ta ashiba den parnok matsüngdang DONER Minister in-charge dangi call süa Education dak sendakba nung NE state temi timtem ajangshiba tem den pa densen ka amentsü asoshi ayongzüktsü mepeshia liasü.

Mokokchung DEF tenzükba anogo amung



Mokokchung SP Vishal densema DIG Range/NAP Tuensang, Rajashekera N IPS-i New Reserve Mokokchung nung multi-purpose hall 'Inti Salang' lapoktsüba mapang tangokba noksa nung angur. Mokokchung, February 25, 2021

Mokokchung, FEB 25 (TYO): DEF Mokokchung tenzükba anogo den repsema 'Inti Salang' ta sür multi-purpose hall lapokba sentong ka New Reserve Mokokchung nung kaogo.

Iba sentong nung special guest, DIG (Range/NAP) Tuensang, Rajashekera N IPS-i jembidang, Mokokchung SP Vishal IPS lenisüba kübok covid-19 wara ajanga alima ajungalen makmakshimakba mapang tensa tia kanga junga azüokba den tangar dang nungi balaka district tejakleni anir aoba ngua pelaba den ano pa kübok alir aser jawan ajaki lungjemer inyakba asoshi ajak dang pelaba metetdaksü.

Mokokchung DEF-i police-tem ajungshia award balala shimteta tapet tetushi agütsüba jangratemtsüka lir, ibaji ajanga police-tem pei tata mapa nung meranga inyaksü jangradaksür, ta pai ashi.

Assam Rifles temi Ngwalwa yimtsüng nung mürekmejuba mapa inyak

Dimapur, Tsüklai/February 25 (TYO): IGAR (North) kübok Assam Rifles, Jalukie Battalion ajanga 'Amrut Mahotsav' kübok mürekmejuba sentong ka Ngwalwa, Peren nung February 25, 2021 nü ayongzüka liasü.

Iba mapang nüburtem nem anogoshi mürekmejua alitsü

koda tongtipang, ta asüba angazükdaksü aser mürekmeju maliba ajanga temang nung timtem agütsüba indang angatetdakja liasü.

Maneni India sorkari Swatch Bharat sentong tenzükba indanga parnoki nüburtem nem angatetdaksü. Iba cleanliness sentong nung iba

Mokokchung district nung case kanga ajema akümba aser Mokokchung police-i case balala kanga junga lateta bener aoba asoshia paisa pelaba shisem.

Mokokchung district ya tanga district dang nungi khenyongi balaka lir, yangi alirtem ya mapa inyakba sobaliba (work culture) kanga tajung, iba tanelaji maneni bener odaktsünür aser sorkari asenok nem itasen talang agütsüba ama pei tata mapa nentaka aser meranga inyaksü asoshi Rajashekera-isa tayongzüka ka agütsü.

Sentong nung Mokokchung SP Vishal IPS-ia mapang tatsüka agia jembi. DIG Rajashekera ket nungi Best Police Station aser Commendable Team Award-tem agüja liasü. Parnok Raising Day nungtem nung Volleyball aser Tug-of-War nungertem asayaa liasü.

yimtsüng nungi tanur tain ajak agi nisung 42 tashi tejangraba tulu nung arua dena liasü.

Security forces temi iba ama sentong ayongzüka atema yimdaklirtemi pelashishia agizük aser tarutsü nunga tzümpung müreka ayutsü asoshi sentong balala yanglutsü ajungshia liasü.

Medziphema nung morok mi lendong atalok



Central Institute of Horticulture Medziphema, Dimapur nung morok mi jangrua alidak Fire Personnel temi mi remseptsü merangba mapang tangokba noksa ka yangi angur

Dimapur, Tsüklai/February 25 (TYO): Central Institute of Horticulture Medziphema, Dimapur nung mi lendong atoka lir ta February 24, 2021 nikongdang 2:39 ako nung osang aruba sülen Fire Station Chümoukedima nungi Fire & Emergency Services team ka

Duty Commander ASI Thangpong Khamniungan-i anir iba mi remseptsü oa liasü.

Mibenertem hadir tabensa bener oa mi remseptsü merang, kong arem hectare ana shi rongdoker liasü. Mapang shidak nung osang angazüker telangzüba

agütsüba ajanga mi ya remseptsü aser tali jangrua aotsü aliba nokdangtet.

Fire Team-i ghonda ka ser minute 30 agia iba mi remseptsü. Tang tashi iba mi adokba kuli tejangja monguteter aser iba lendong nung asü-amaba meliasü.

Mokokchung Deputy Commissioner-i metetdaksür

Dimapur, Tsüklai/February 25 (TYO): Nisung kari NH-02 kübok Km.135.00 (Alichen) nungi Km.147.00 (Sewak Gate), Km.156.00(DEF) nungi Km.168.00 (Yisemyong) aser Km.185.00 (Unger) nungi Km.220.00 (Assam Rifle Gate, Tuli) tsünga ki-o-jen yanglur, ta Deputy Commissioner, Mokokchung, Limawabang Jamir-i sangdong ka ajanga ashi.

NH-02 single lane nungi 2 lane kumshiba maparen nung ki-o-jen raksaba atema teyari agütsütsü asoshi NH team aser Line Departments, District

Administration ajanga yimtsüng shia putu menden den osang agitepa asameyanga mapa tembangogo, ta sangdong ajanga ashi.

Anungji nisung shingaaia RoW tasazük nung aliba alinung temelaba melie terenlok mapa talila inyaksü memelar.

Asazüka aliba RoW nung ki-o-jen yanglua terenlok tasen inyaksangshiba kecha teyari atema mezüingshitsu. Iba ama ki-o-jen yanglua aliba aser tang teyangludak aliba ajunga teyanglur khuret asütsü, ta sangdong ajanga ashi.

Anganwadi workers tem nem training agütsü



Dimapur, Tsüklai/February 25 (TYO): February 25 nü Chumukedima Block kübok Anganwadi workers 18 nem onük balala nung tangazükba agütsüogo. Training nung Prodigals' Home kübok Community Mental Health Programme (CMHP) staff aser Women Helpline 181 Nagaland nungi Senior Supervisor kati tangazükba balala agüja liasü.

Mezüngbuba session nung CMHP nungi Akovi, Nitoka, Sentimenla, Yangerjungla aser K. Sani nung shisalen agütsür liasü. Parnoki Schizophrenia, Bipolar Disorder, tanga psychotic disorders, Depression, Anxiety, Phobias, amala Mental Health, Mental Illnesses aser Convulsive Epilepsy o Intellectual Disability onüktem nung Anganwadi workers tem nem tangazükba agütsü.

Anganwadi workers tem yagi nüburtem den tali ansaba sendaktepa inyaker, anungji training agütsüba nükjidong tongtibangtibaji Anganwadi workers tem nem temalen shisema aliba timtemtem indang angazükdaksütsü asoshi liasü, ajita asünungdang parnoki item timtem keta alirtem mela mela jangjatsü aser teyari asoshi CMHP dangi yoktettsü.

Tanabuba session nung Women Helpline 181, Nagaland Senior supervisor, Chothalu Phesao-i, toll free number 181 indang metetdaksü, koba tetsürtem atema mejeta amenokba 24X7 helpline number ka lir. Laisa, iba helpline number ya Nagaland nung 2016 küm amenok aser timtem nung aliba tetsürtem nem medical, legal aser psychological teyari agütsütsü nükjidong nung amenokba lir ta ashi.

Temetetsükaji '181' helpline

ya India nung 2012 küm Delhi nung tetsür ka tashiyim agi raksaja tepsetba sülen 2016 küm amenok. Phesao-i ashiba agi, helpline number amenokba sülen iba number ajanga timtem nung aliba local aser non-local tetsür meyirejang ka dak tema nem teyari agütsüogo. Laisa, 181 helpline number ya Nagaland nung tetsürtem nem facilities aser scheme balala agütsüba indang metetner ajaki amshitetsü, ta ashi.

Sentong tatemi Yangerjungla-i, "Menstrual Initiative Nagaland" tenung nung sanitary pads agi anungba aser menstruation dak sendaka aliba maksütem samadaksütsü aser sanitary pads maturtem nem bio-degradable pads agütsütsü asoshi maparen balala benoka inyakbatem indang metetdaksü. Sentong nung shilem agirtem ajak nem "Menstrual Initiative Nagaland"-i sanitary pads agüja liasü.

CMHP Project kübok Guwahati nungi Consultant Psychiatrist ka aser CIHSR, Dimapur nungi Clinical Psychologist kati temalen shisema aliba timtemtem anepalutsüba den mozü dena agütsür. Kasa mapang nung CMHP team-i Psycho education agütsüba den ki semdanga maneni timtem nung alirtem anepalur aser iba den ano stakeholders tem nem awareness programs, IEC development amala training agütsür.

Azim Premji Philanthropic Initiatives, Bangalore-i senotsü teyari agütsüba den Ashadeep, Guwahati-i technical teyari agüja CMHP ya tang Chumukedima Block kübok yimtsüng/kiyong ajak nung benoka inyaksangshidar.

Shah-i tenüing mami AJP & Raijor Dal dang longkak aitba party aja



Union Home Minister Amit Shah pela agizükba noksa nung angur.

Guwahati, Tsüklai/February 25 (Agencies): Assam, Nagaon district kübok Batadrawa nung Brehostibarnü lokti senden ka nung o jembiba mapang Union Home Minister Amit Shah-i, Assam Jatiya Parishad (AJP) aser Raijor Dal amala regional party tem tenüing mam saka parnok dak rangloker parnok ya longkak aitba party tem ta ashi.

Amit Shah-i AJP aser Raijor Dal metetshi ashiba agi, "BJP indang votes ajema kümdakja Congress nem takok agütsütsü atema longkak aiterem tenüing balala nung toktepdar."

Amit Shah-i, "BJP indang votes ajemja Congress nem takok agütsütsü atema longkak aiterem tenüing balala amer toktepdar. Parnok nükjidongji Congress nem takok agütsütsü atema lir. Parnoki sorkar mekümettsü ta parnok densema ajaki meteta lir, ajisüaka tesasasüka BJP indang vote ajemja Congress nem takok agütsütsü parnoki merangdar," ta ashi.

Union Home Minister-i jembiba olen ya aikati Assam nung Citizenship Amendment Act (CAA) anema nokdakertem mezüingmeshiba olen ka ta züingshir.

Temetetsükaji Assam nung Lurin Jyoti Gogoi-i aniba Assam Jatiya Parishad (AJP) aser Akhil Gogoi-o aniba Raijor Dal party ya regional party tasen lir aser party ana ya toba küm CAA anema longkak aiba nungi poktetba lir.

Kasa mapang nung Home Minister-isa, Assam nung kümshia tzümetsüing agi kangshiba tebilemstü BJP-i

bentettsütsü, ta ashi.

Assam nung BJP-i aniba sorkari taoba küm 5 tsüingda state nung tzümetsü aser anentsüh agi kangshiba tebilemstü mebenetteti arudar.

Küm pongu kanga mejungi tamakok anguba sülen Home Minister Amit Shah-i ano Assam nung aliba nüburtem dang state nung tzümetsü tebilemstü bentettsü atema küm pongu meshizüker.

Nagaon district nung 'Maha Mrityunjay' Temple semdangba sülen osangbenertem den sensaksemba mapang Amit Shah-i, BJP-i Assam tzümetsüing nungi jenboa toktsütsü nangzükber, ta ashi.

Paisa, BJP-i state ya ozüing alema bendanger senoka aitba nungi jenboa toktsütsü, ta ashi.

Temetetsükaji taoba küm ana tsüingda India-Bangladesh arrtsü nung arrtsü anükertemi nisung 1045 puogo, koba tang tashi nung timtiba asütsü.

Iba osang ya pa indang deputy, Nityanand Rai-i February 8 nü Lok Sabha nung metetdaksü.

Kasa mapang nung Assam nung 2016 Assembly elections mapang BJP puri nangzükba tongtibang onüktem rongnung India-Bangladesh arrtsü shibanga ozüing alema bendanger senoka aitba nokdangtsü nangzükba densema liasü.

Iba Vision Document nungsa arrtsü ajunga shibangtsü atema Centre den sendaktepa inyaksü asoshi nangzükba densema lir.

Tenangzükba agütsür küm pongu shi süia aoer saka tenangzükba ya paper nung dang lir.

Assam nung bendanger menokdangtetba aser tzümetsü tebilemstü mebenetteba sülen BJP tenangzükba ataloktsütsü atema Union Home Minister-i ano küm pongu meshir.

"Asenoki Assam ya tzümetsüing, bendanger aser azütokshi nungi jenboa toktsütsü nüingdaker," ta Union Home Minister Amit Shah-i

Maneni Shah-i, "Assam koba longkak aitba, prangbong injang aser azütokshiba nung kanga nüingtugu liasü iba state ya tangbo terenlok, industrial investment, education & tourism nung kanga nüingtugu kümogo. Ajisüaka maparen ano metembang lir," ta ashiba den PM Modi-i Assam meraket bener arutsütsü atema akokba tashi inyakogo, ta ashi.

Iba olen lemsatepba sülen Assam Congress tir Ripun Bora-i Union Home Minister Amit Shah aitsüogo.

Ripun Bora-i, Congress-i yimsü asüba mapang Assam nung mangatettep aser telungpur tebilemstü tajemba aküm ta ashi.

Paisa, Citizenship Amendment Act (CAA) benoka Assam maneni telungpur agi timtemba aser mepetmesü dangi tanaben meyipa anir aoba atema Amit Shah aitsü.

"Assam Congress-i state mepetmesü aser telungpur agi timtem agüja aliba tia nungi anitet. Amit Shah indang CAA ajanga Assam tanaben mepetmesü, curfew aser azütokshi dangi meyipa anirogo. Yimjung melira terenlok malitsü. Assam-i Congress meyipa aginer," ta Ripun Bora-i ashi.

Mizoram-Myanmar bus service atema temelaba atadar: Lalnuntluanga

Aizawl, Tsüklai/February 25 (Agencies): Mizoram aser Myanmar na tsüingda bus senzütsü atema Mizoram sorkari tang tashi Union Ministry of External Affairs nungi temalaba mongui lir.

Iba osang ya Mizoram Transport Minister TJ Lalnuntluanga-i lemsatepa liasü.

Mizoram Transport Minister TJ Lalnuntluanga-i, state Assembly nung ashiba agi, Aizawl aser Myanmar kübok Tahan tesem na tsüingda bus service ka tenzüktsü atema Mizoram sorkari Centre den tongtepratepogo.

Paisa, External Affairs Ministry nungi telangzüba ka atema State sorkar tang tashi atadar, ta ashi.

Mizoram sorkarisa, kidanger state Manipur aser

Tripura den sendakteptsü atema bus service tenzüktsü telemtetba agiogo, ta Lalnuntluanga-i ashi.

Iba bus service ajanga Aizawl aser Manipur nung Churachandpur jila aser Tripura nung Kanhmun jila sendakteptsü, ta pai metetdaksü.

Paisa, Manipur sorkari mepeshiba ama tenangzüktepbaba agiba indang osang agütsüogo aser temelaba atadar, ta State Assembly nung metetdaksü.

"Bus service ka atema Tripura sorkar dangi bendangogo aser temelaba atadar," ta pai ashi.

"Item inyakyimtem ya COVID-19 wara prokshia aoba ajanga takaratiba nung minyakteti lir," ta Mizoram Transport Minister-i ashi.



Imphal, February 25 : February 25 nü Imphal West District kübok Thangmeiband Cheirao Ching tesem nung Eco-Tourism Project ka Manipur Chief Minister N Biren Singh-i semzüktsüogo. Eco-Tourism Project ya Ministry of Department of Development of North Eastern Region (DoNER), Non-Lapsable Central Pool of Resources (NLCPR) kübok terenlok bener aruogo.

'Greater Tipraland dak akala tanga kecha magitsü: Pradyot

Agartala, Tsüklai/February 25 (Agencies): Tripura kübok Khumulwng nung TIPRA aser IPFT nati parnoki tashi sayua taruba Tripura Tribal Areas Autonomous District Council (TTAADC) election atema lokti senden ka ayongzükba kaogo.

Indigenous Progressive Regional Alliance (TIPRA) aser state nung BJP sorkar den longjemmer aliba Indigenous People's Front of Tripura (IPFT) na tawa taruba TTAADC election atema longjemogo.

Khumulwng nung lokti senden nung ojembiba mapang TIPRA mendenbuba Pradyot Deb Barman-i, lisopur lenirtem longjemba ajanga parnok taginübatem Centre nem metetdaksütsü asoshi tanga mapang dang nungi teyari tuluba agütsütsü, ta ashi.

"Lokti ka ama asenok longjemtsü mapang tongogo, asenok shilu ka ama longjemmer,

asenok TIPRASA ama longjemmer. Kechiyong nenoki onok küm 70 tashi nenok kübok yuogo. Onoki ya tekübokba jenjang nung aliba nüburtem masü aser nenok nem onok yimsü mesüdaksütsü mesera onok timla ajemrepa meyudaksütsü. Onoki onok meraket tanaben amenokshitsü kechiyong iba ya TIPRA lir," ta Pradyot Deb Barman-i ayima ashi.

Pradyot Deb Barman-i ashiba agi, TIPRA aser parnok den sendaktepa aliba party temi 'Greater Tipraland' dak alaka tanga kecha magitsü.

"Kecha dena 'Greater Tipraland' ahangba memelenteptsü," ta Deb Barman-i ashi.

Kasa mapang nung IPFT tir aser Tripura Minister NC Debbbarma-i, TTAADC elections sülen BJP den tesendaktep dak sendakba nung par party-i telemtetba ka agitsü, ta ashi.



Shillong, February 25: Lok Sabha Speaker Om Birla-i tang anogo ana atema Meghalaya yimtiba Shillong semdangba mapang lir. Pai Legislative Assembly züingsemtem den ajuruteptsü aser New Shillong Township kübok Mawdiangdiang tesem nung tang yanglua aliba Assembly ki tasenba asadangtsü.



TIR YIMYIM YIMOBILEM (EDITORIAL)

DIMAPUR ROGONÜ, TSÜKLAI(FEBRUARY) 26, 2021

BACKWARD-BO MASÜ!

English oshi nung 'Backward' tetezü ya tesüeni aoba ta angatetter, tetezü tejakleni maor. Anungji, 'backward' ta asüba o ya tetezü majung, anungji tangatsüa majung. Ajisüaka, o tamajung ka ya Nagaland government oshi nunga dena enoka kodaser amshitsü tenzük ta bilemdangtsübaji tang tensa ya kanga tongtibang kümogo. Nagaland state akümdang, Nagaland ajunga ya tangar menepa tejakleni maoba kin aser tesem liasü. Tesem tesem nung kaketrejua züngteta dang liasü aser yimtsüngtem nung alirtemibo yim tonga gari arutsübjibo yutsür, gari-a mengudang aser anünglen tayimtsü senzüba ngur süngmangseta repringba mapang liasü. Iba ama putu tensa ka nung state angu nungji, Naga nunger ajakji tangar memenepba kin liasü, iba jagi tejakleni aoba kin masü saka tesüeni aoba kin ka ta bilem südi. Iba tangatetba nung, ano, Nagaland nung Naga nunger kintem rongnunga tera shia metetba kintemji 'advance' kintem aser junga shia memeteter kintemji 'backward' kintem ta lemdanger, talisa, government mapa nung 'backward' purtem nem shilem balaka shiteta yutsütsüsa government sentong tenzük südi. Ibayongji, tanü Nagaland nung 'backward' ta asüba jenjang nung aliba kintem asoshi government mapa nung dang masü saka technical azüngtsüba maparen nung dena shilem balaka shiteta yutsür. Atangji, India songjen nung asadagra, Nagaland nung aliba Naga kintem ajak ya tangar memenepba kintem lir, saka parnok dang "backward" ta masü saka Scheduled Tribe ta ajar aser ST jenjang nung alirtem asoshi government mapa nung aser technical azüngtsü asoshi menden balaka shiteta toktsür. Iba jagiang, tangar akhi tsürabur mapang nungi shia metetba kintem den kasasa metokteptyonga asenoka asen shilem lemzüksüba nungi maongka angur. Iba kasaji Nagaland nunga koba kintemsa tangar menepa tejakleni moutetter, parnok kintem nem kasa maongkaji agüja anitetsü meranger. Atangji, parnokji menur külenang kaketshisatsü angazük tenzükba agi aser pi dang nungi tesü terenlok mapatem agi tangar memenepi timtem takoksa anguba tia nung lir, anungji parnokji tejaklen purtemi anepalua anitetsübjaji kanga tongtibang lir, saka parnokji tesüeni aoba purtem masü saka tejaklenibo tejakleni aoba nübortem lir, anungji tejakleni moutet tesüeni aoba 'backward' kin ta majatsüla. Iba jagi kodang jungjunga bilemdangdir, mezüngmeshiba o ka amato angatetter. Iba jagi, ashiko, shitakba tejakleni aotsü melen shitakba tesüeniang aotsü akok. Kechi mapa nung südir süang, tenüngji kanga tongtibang, anungji Nagaland nung kin kar nem 'backward' tenüng agüja aliba melen tenüng tapet ka agütsür kasa (reservation) maongka agüja yariteptsülaa ta bilemer. Atangji, yakanü Eastern Naga People's Organisation pur silver jubilee amongba sentong nung jembidang, Chief minister Neiphiu Rio-i ashi ama, joko Nagaland nung 'bakward' ta ajabaji nisung masü saka tesemtemang backward asütsüa akok, kechiyong asen lima ya tajungba renloka aotsü melen merenlokteti tamajungba-ang ka küma aoba angur. Iba jagi kodang bilemdangdir, Nagaland nung Mokokchung district nung dena tangar menepa merenloktetba "backward area" aika angutsü. Iba tangatetba nung Nagaland nung Naga nunger shingai shinga danga 'backward' ta majatsüsa iba oshi ya melenadoktsüla. Nisung dang 'backward' aja tashi tejakleni maotsü. Iba jagi nisung ka tezüdangdaksür aser tasü mait küm daksür, anungji tangar asoshi teyarir lenir tajung ka akümtsü melen tangar dak dang nendaka aliba taküm aser lokti ka akümer. Iba jagi tanishir asütsü melen teti tanidaker aser tagütsür asütsü melen teti temeshir asütsü dang bilemer. Aji oda, Nagaland nung alirtem ya ajak liromedema tejakleni onüra, kar tejakleni aoba telok nung aden aser karbo tesüeni aoba telok nungang aden ta mesüi, ajak tejakleni aoba telok nung züngsemtsüla aser külemi tejakleni aodang karaa moutettertem asoshiang teyari aser maongka, tang amai, shiteta yutsütsüla.

OLEMSABANG

HORNBILL FESTIVAL - SHIBA AJANGZÜKER?

~ Wati Longchar (Serampore)

Indigenous culture in Taiwan is marketed. Today Mountain People (indigenous people in Taiwan) are a disadvantage group. This group of people is similar to other indigenous people around the world - loss of land, collapse of traditional culture, loss of language, poverty, sense of inferiority, alcoholism, sale of daughters as prostitutes, sale of unskilled labour in fishing, mining and construction.

- Michael Stainton

Hornbill Benjong

2000 küm nungi Nagaland nung December 1-10 tashi Tenem Ozü Benjongmung (Hornbill festival) munga arudagi. Naga nunger tar nunger otsü aika nung tenem ozü indang shia lir. Asen lima nung joko tenem ozü mali, saka tanü tashi tenem ozü ama tobur tajung, teyakyak, jeretpera, akhüm taket, jenjang tulu aketba ozü ta jembia arur. Aor otsü nung Longkhümtsür aiür ana Ao lima yim aika sema tenem teneben yoka aoba tanü tashi otsü mamar. Tetsü-tebou putu nungi yar-tsüngsang, benjong-bentsü mapang, talisa nokinketer temi tenem ozü teben temko nung enoka asemer aser ibaji ajanga mera keta ajir aser yimti lemladaksür. Naga nungeri benjong aika amunger, saka aluruba benjong ya anogo balala nung August ita nungi tenzuka November tashi Naga kin ajaki munga arur. Iba den December 1 nung Nagaland state anguba benjongmung amunger, yongji Governmenti anogo ter "Festival of Festivals" - benjong rongnung tetsüti, tulutiba ta ayonga munga arudaki. Medemeri Nagaland semdangner ta ashidang December tetenzüklen arung tasa ashir kechiaser iba mapang hornbill festival lir. Pi bendanger, medemer khenang arutsüji pelaa mungger yokner aser tangar dang Naga nunger sobaliba takar ta sayutsü mapang tajung ka. Iba hornbill benjong asatetba atema lenir dang peladi.

Naga nunger kin 16 sanger aser state balala nungi tejaoker kintem ajak kilem ka kübok anogo ter tashi longsopepa, yar tsüngsang, kenten-menü, ola-angla sayuba aser ayokba, chiyungtsü balala, sai-sapong tapu balala, tetoktepba balala (Naga mertsü chitepba tashi), nara, herbal mozü, fashion show sayuba ajanga Naga nunger telungjem sayur. India nung tongti leniri anir alima tesem balala nungi nisung 2.50 lakh tema, aser foreign lima nungi 3000 tema arua semdangbaji takok tulu. Jangratemtsü ka. Osang kaket, Radio, TV aser social media ajak nung hornbill festival indang dang angur. Ano tanga lima nungi aruri Naga nunger sobaliba tajung angazükdaksüba dang masü, Naga nunger rongsen ketzung nunga renloka odaktsütsü nükjidong nung iba benjong tenzükogo. Hau, tashimait aser temelenshitsu aika jembiba angashiogo aser nguogo; karibo nungdak mali, jabujari tali, anentsüla ta ashiba nguogo. Saka ni angatetba isab nungbo tourism industry ya asen den alitsü. Menokdangtetsü. Sensaker aika iba industry dak metalokter taküm alitsüsa akümtsü. Joko Nagaland ta süra "hornbill festival" ta ajak mulungsentsüi aittsüsa renloka arudagi. Ya koda sür tajungba, nisung aika arutetsüsa tajungba yanglutsü ta asüba nükjidongjiang asütsüla. Iba benjong ajanga Angami nunger takar ishika Kohima aser Kisama temeküt nung alir, mesüra Government nung inyaker ishika tajangzük asoshi dang masü, saka koda sür Naga nunger yimkong ajangzüksü aser alima dang koda Naga nunger sobaliba tajung angazükdaksütsü, iba nükla nung hornbill festival asa-lendong asütsü nungdak ta ajiteter. Kohima nung Hornbill festival akaba dang dang masü district shia nung, tzükong aser yimtsüng shia nung, tekong-tenem balala nung tourist puatsüsa aser parnok lesson tajung angazüker aotsüsa yanglutsüla. Hornbill festival mapang dang masü, küm piyong Nagalandi arunütsüsa yangluba ajanga nübur aika tajangzük ngutet.

Look East, Act East

Tsüngremi tobur tajung lima den, aener dang jungnüba, temeim sayunüba, sobaliba tajung aser sempet tajung kar, sentsü-bangtsü tobur tajung aiür-asangur aika aliba ajanga tourism industry yakta züintsü ta ajiteta Governmenti anir inyaka arudagi. Congress yimsüsüba mapang "Look East" ta jembia aruba, tang BJP Governmenti "Act East" ta melenogo. Tourism industry takok ngua inyaktet nungbo India rongsen ketzung renloktsü nükla tulu lir. Kechiba India-i North East nung tenük yoker? North East India ya alinükbo tila ka dang, saka country pungui - China, Myanmar, Bangladesh, Bhutan, aser Nepal - mekütbanga lir. India denabo alima trok ajurutepba (golden triangle) tesem ka. India denbo NE ya 22 kms agi dang sendaktepa lir (chicken neck ta ajar), saka China den 1,395 kms, Myanmar den 1,640 kms, Bangladesh den 1596 kms, Bhutan den 455 kms aser Nepal den 97 kms agi sendaktepa kar. Mekütbanga aliba linük denji dang masü, tanga lima Thailand, Vietnam, Laos, Singapore, Malaysia ama dena gari lenmang agi mela mela sentaktepa shishilemba mapa renloktsü temela. Anungji tourism industry lapoka aoba ajanga item temeküt country den India rongsen ketzung maparen balala nung terenlok adokdaksütsü nükjidong nung "Act East Policy" sangdongogo. North East India nung lenir aikati, Neiphiu Rio, Comrad Sangma, Kiren Rijiju nunger ajaki tourism industry ya "motor of development", yimchijimjung aser rongsenren renloktsü aser lanur aika mapa ngutetsü ta jembia arudagi. Airport, lenmang aser tanga terenlok mapa renlok daksüba ajanga nüburtem tajangzük angutsü ta tangatetba nung mapa aika inyaka arudagi. Tourism industry dang "smokeless industry" ta ajar, aser iba industry ajanga mapa tajung dang bener arutsür amai bilemba agi arogo aser NGO balalai ola madoker. Saka tanü tourism development yagi shiba tajangzüksü angur ta asüngdangtsü mapang ka tonggogo ta ajiteter? Ibai temoatsü ka asütsü asü, atakatem ka asütsü? Government, arogo aser civil society balalai tourism dak sendakba lokti tememen menokdangra temoatsü melen, meyipier lokti dangi teraksa jendi bener arutsütsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Mizoram nung ita 10 sülen Tenla kitem tanaben lapokogo



Aizawl nung aliba Solomon Tenla ki noksa nung angur. Mizoram nung Tenla ki tulutibaji Solomon Tenla ki ya lir.

Aizawl, February 25, 2021: Yaküm India nung coronavirus wara kanga bulua prokba mapang March 22, 2020 nungi linük nung tekülem kitem shibanga liasü, yamaji Mizoram nunga ita ter dak tema Tenla kitem shibangba sülen tanaben lapokogo.

State sorkari Tenla kitem tanaben lapoktsü melaogo, ajisüaka Tenla kidang menden shilem 50 nung dang nisung melatsü metetdaksü. Tenla kidang tekülem sentong agitsü atema Honibar aser Amongnü na dang melar aser tekülem sentongji anüngdang ang

agitsüla. Khristan nütsüng timba aliba state, Mizoram nung coronavirus wara süngjemba sülen state sorkari tekülem kitem tanaben lapokdaksütsü atema telemtetba agi.

Tenla kitem tanaben lapoktsü melaba sülen state nung Seventh-Day Adventist Arogotemi tema Tenla kitem lapok, iba sülen anogo ka lir Baptist Arogotem, Presbyterian aser tanga denominations balalaia Tenla kitem lapoka tekülem sentong agidar.

Tenla ki tanaben lapoktsü

melaba atema pelaba lemsatepdang Evangelical Free Church of India (EFCI) nungi Lalhmunsang F Tusing-i, "Onoki Tsüngrem dang pelar aser wara meshimeshia nokdangtettsü atema maneni sarasademer," ta ashi.

"Tenla kitem tanaben lapokdaksüba ajanga Khristantem pelateper," ta EFCI nung züngsem Lalsiamkunga-i metetdaksü.

Mizoram nung tang tashi nung nisung 4,000 tema dak coronavirus putetogo saka tang teshirangdakpurtembo nisung 23 dang lir.

Uttar Pradesh nung Unlawful Conversion of Religion Bill agizük

February 25, 2021: Tamangba yimsü meyipdaksüba nokdangtsü atema February 24, 2021 nü Uttar Pradesh nung anti-conversion bill ka agizükogo.

Uttar Pradesh Prohibition of Unlawful Conversion of Religion Bill, 2020 ajanga yaküm November ita nung agizükba ozüing melentsü. Bill tasenba kübok aibelenertem küm 10 tashi tepuokdak ayutsü aser senchi 50,000 tashi achitsü akok.

Lucknow nung UCA den jembidang Khristan putir, Gerald John Mathias-i, "Bill tasenbaji menüingdak, kechiyong state nung tamangba yimsü meyipba nokdangtsü atema bill ka lir. Iba ya tebilemstü onük ka lir, kechiyong majority teloktemi minorities anema iba ozüing tim mesüi amshitsüa akok," ta metetdaksü.

"Linük nung Catholic Arogoi tamangba yimsü majungkettsür mesüra memeyipdaksür, aser ozü state nungbo tamangba yimsü meyipdaksüba nung Arogoi shilem agiba otsü mali," ta paisa metetdaksü.

"Arogo ka ama onoki charity mapatem inyaker aser ibaji mesüzüker ta mezüngshitsüla. Ajisüaka onoki charity mapa inyakbaji tamangba yimsü

meypdaksütsü atema mesüzükba mapa lir ta onok nem tai tongloksütsüa akok," ta pai ashi.

Kibong akümba sülen tamangba yimsü meyipdaksüba anema ozüing ka benoktsü atema Uttar Pradesh Chief Minister, Yogi Adityanath-i mapang talangka nungi bilemba liasü.

Varanasi nung Center for Harmony & Peace Chairman, Muhammad Arif-ia, ozüing tasenbaji state nung menüingdak, ta jembio.

"India linük temzüng ajanga asenoki tamangba yimsü mashie amangtsü aser benshitsu atema temeden agütsür, ajisüaka nisung ka tamangba yimsü mita reprangtsü atema iba bill benokba ya meimchir temeden anema lir," ta Arif-isa ashi.

"Sorkari mapa manguba tebilemstü, chiyungtsü agi anüngba, sensak tia aser lanurtem tebilemstü atema nendaka inyaksüla. Alimai terenlok indang jembir, anungji sorkari iba nungji dang rangloker inyaksüla," ta Muslim lenirisa metetdaksü.

BJP-i yimsüsüba state kar nung tawa anti conversion ozüingtem benokogo aser tang Uttar Pradesh nunga Congress

party, Bahujan Samaj Party aser Samajwadi Party temi iba bill anema nokdakyonga sorkari agizükogo.

Bill tasenba kübok, tamangba yimsü meyiptsü atema dang kibong akümer süra kiyimbaji magila kümtsütsü. Kibong akümba sülen tamangba yimsü meyipnertemi jelia district magistrate nem osang metetdaksütsüla.

Uttar Pradesh Prohibition of Unlawful Conversion of Religion Bill kübok nisung shingiaia tamangba yimsü memeyiptsüla, mesüra m e y i p d a k t s ü t s ü memerangtsüla. Shingiaia tashiyim amshia, mesüzüka mesüra kibong akümba ajanga nisung ka tamangba yimsü memeyipdaksütsüla.

India nung nütsüng timba aliba state Uttar Pradesh nung nütsüng million 200 jungnüa lir, ajisüaka state nung Khristan nütsüngbo 350,000 dang lir (nütsüng shilem 0.18). India nung Khristan nütsüngbo shilem 2.5 shi dang lir.

Centre nung BJP sorkar aliba dang masü saka Uttar Pradesh nunga BJP sorkar lir aser BJP ya

Rashtriya Swayamsevak Sangh (RSS) den tesendaktep junga lir.

ANOGO ABEN TSÜNGREM DEN

Anepdang, I bri 4:9-16

Anepdang ne metsü prokang aser nikongdang ne teka azümesena teli. Sayu. 11:6

Anepdang shia asenok asoshi anogo tasen ka tenzüker. Anogo tasen tenzükdang tayongzükba tangazük tasen ka maongka angur.

Iba tangatetba anepdang tasen jagi Khristan tamang noksa temaitsü mayur. Khristan yimsüi iba dang 'tanga mapang tajung ka ta ajatsü akok.' Asenok kechi bilemer, mesüra kechi inyak, mesüra kechi meinyak, asenok koma liasü, mesüra mali asü kecha masü-kecha balaka mali. Tsüngremi asenok nem tatok agütsür. Pai anak ajak aitoktsür anungji asenoki tasen kümshia tenzüksü akok. Tatok agütsüba nung kecha telemtet maka, mapang tajung tatembang maka. "Tanaben merangang. Khrista nung Kü taochi teti na meketa lir. Nai tamakok manguba agi ni na meimer masü; nai tamakoktem nguaka ni na meimer" ta ashitsü Tsüngrem teti renema lir.

Asen ajaki metetta aliba ama, 'Aibelentsüji meimchir yimya.' Ibaji ochi. Kasaji, 'Tatok agütsübaji Tsüngrem lir' aji shidak. Kechiaser Pa Tsüngrem aser Pai kodang tamakok mangur. Asenoki tamakok nguaka asen taküm teti tanga mapang 'tajung ka den alir.'

Kibuba, nai kü nem mapang tajung ka agütsüba asoshi Ne tenüng asanger. Amen.

Khristantem aikati Lebanon toktsür ajener

February 25, 2021: Yaküm August ita nung Lebanon nung bomb lendong atalokba sülen Khristantem kongshir, tang Khristan meyirjang aikati Lebanon linük toktsür jendar.

Arab lima nung Khristan timba aliba linükji Lebanon lir (nütsüng shimen 35 shi), iba sülen Egypt aser Syria nunga nütsüng shilem 10 shi Khristantem lir.

Lebanon nung yimtenren party balala aser tamangba yimsü balala nungi lenirtemi agiba tezüngzüktep 'National Pact' kübok linük nung Tirji Maronite Khristan ka asütsüla, Ato kilonserji Sunnite Muslim nunger asütsüla aser Parliament Speaker ji Shiite Muslim nunger asütsüla.

Catholic charity Aid to the Church in Need (ACN) den jembidang Beirut nung aliba Maronite Cathedral nung putir, Jad Chlouk-i, Khristantemi pei tetsü taso li nung nüburtemi parnok sendoker ama bilemer, ta metetdaksü.

Arrshi küm 38, Jad Chlouk-i, "European Union aser North America nung aliba linüktem nung jenoktsü atema aliba Embassies nung temepishiba shidi 380,000 dak tema agütsüogo aser parnok timbaka Khristantem lir, kechiyong parnoki pei linük nung parnok joko ainertem

ama bilemer," ta metetdaksü. "Iba tangatetba ajanga Khristantem kongshir, kechiyong Khristantem aika samar, talisa yangi tarutsü nung Khristan yimsü lenitsüpur lanurtem aika samar," ta putiri ashi.

"Ibayongji linük nung anogo shia Khristan nütsüng tajemba-tajemba akümer aser tensa tamajungba tamajungba akümer, talisa linük medoktsürtem atema tensa tamajungba akümstü, kechiyong kobi melii parnoki reshikangshi ajurutsü," ta pai metetdaksü.

Lebanon nung osangbenertemi ashiba agi, yaküm bomb lendong atalokba sülen tanga linüktem nung oa alitsü atema temepishiba shidi agütsür 380,000 dak tema kümogo.

Putir Chlouk-isa Middle East linüktem nung Khristan nütsüng kanga ajema akümba lemsatepa liasü.

2003 küm matongdang Iraq nung Khristan nütsüng million 1.5 liasü saka tangbo Khristan nütsüng 150,000 den tajemba lir. Syria linük nunga 2011 küm Khristan nütsüng million 1.25 liasü saka 2017 küm nungbo iba linük nung Khristan nütsüng lakh 5 den tajemba kümogo.

OLONG PAITEP # 5736

1				2				3		4
5		6								
							7			
8										
										9
		10					11			
				12				13		
14										
							15			
16										

TIPIEN		LANGTSÜNGLEN	
2. Auo nung chiyongtsü asenba	- (7)	1. Lenmang	- (7)
5. Mangyimba mapang	- (5)	2. Aor kidong ka tenüng	- (6)
7. O tamendakdak	- (4)	3. Tenarong maten	- (6)
8. Pei dak malangba	- (7)	4. A _ _ _ g	- (3)
10. Juli	- (7)	6. Mopung apodoka	- (3)
12. Sen ayudak	- (7)	ola adokdaksüba	- (7)
14. Tenük agi ajitet	- (4)	9. Tongtipang tagitsü	- (6)
15. Tamajung aküm	- (5)	10. Menungra bilem	- (6)
16. Apuso	- (7)	11. Aiür	- (6)
		13. S _ _ _ k	- (3)
		14. T _ _ _ r	- (3)

OLONG PAITEP # 5735 TELANGZÜBA

TIPIEN :	LANGTSÜNGLEN :
1. Yiar, 3. Tesola, 7. Yimra,	1. Yimti, 2. Amen, 4. Shiner, 5. Alaka,
8. Tangar, 9. Peria, 10. Tanur,	6. Satan, 9. Putet, 10. Tembar,
11. Tasen, 13. Lemjem, 15. Tambu,	11. Tatok, 12. Amang, 14. Jala.
16. Khuret, 17. Sang.	



WARAKLA O WATSÜLA NA ELECTION INDANG OTSÜ ATONGER

Warakla : Ayyaaa...Atongtsüla ana yamato putepa-jungtepa aliba election mechi nung iba amai tsükchitepa malitsü...Arung tai tatok agütsüteper akhi amato lidi.

Watsüla : Ayyyaaa... Atongtsüla nai yamaji longra arur sura kodaser ni mah ta ashitsü.

Warakla : Ena...Atongtsüla küm pongu shia Election ya aruli-oli ta asütsü, taoba lection nung ana party balala asü...Saka shibai metet taruba Election nungbo ana party ka dang asütsü akok. Anungji election mechi nung putu aika tarak mesamatsüsa shingaia takok asaa meinyaktsüla aser ken oa mejembitsüla.

Watsüla : Haauu-niiii... Atongtsüla nai ashibaji shitak ako...Election mechi nung Yisu maru tashi alitsüba yimten, arogo aser loktiliba nungbo tarak meketdaksütsüla. Election mechi semchi-semnur tashi tarak maitoktetsüsa mapa kecha meinyaktsüla aser ken oa mejembitsüla. Alima nung ya kenu amai dangbo malir...Tanü jenjang junga alirji ashiko asüngbo jenjang majungtsü akok. Tanü nubensorji ashiko asüngbo kijasar akümtsü akok. Anungji tanü jenjang junga lir ta sur shingaia tashiyim meinyaktsüla aser tali-tapong mejembitsüla.

Lilir : WhatsApp

TANÜBO NAI LANGZÜANG

Q. Silver Antimony Telluride nung _____ meyoktepa lir.
 A.Silver B.Copper C.Tellurium D.All the above

_____ (Taruba adok nung onoki langzüsü)

YASHI ADOK TELANGZÜBA : 197

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

TAOBA MAPANG FEBRUARY 26 ANOGO ATALOKBA TONGTIBANG KAR:

- 364 - Valentinian I ya Roman Emperor ama sangdong
- 1266 - Anüolen tip Italy tsütsü Benevento tongbangrara nung 'Manfred of Sicily' aser Charles of Anjou indang sepai tsüngda raratep.
- 1797 - Bank of England-i mezüng pound (£)1 note agütsü.
- 1863 - Abraham Lincoln-i National Currency Act sign asü.
- 1866 - New York Legislature-i NYC Metropolitan Board of Health tenzük.
- 1884 - Leopold II-i Congo nung British & Portuguese treaty sign asü.
- 1891 - Oslo nung Henrik Ibsen indang "Hedda Gabler" sayu.
- 1907 - British Petroleum (BP) tentetsü atema Royal Oil aser Shell na loktep.
- 1916 - Persia nung Russia sepaitemi Kermansjah makdok.
- 1919 - Arizona nung Congress-i Grand Canyon National Park tenzük.
- 1929 - US President Calvin Coolidge-i Grand Teton National Park lapoktsü.
- 1930 - Mansfield Theater nung "Green Pastures" jilushi lapok.
- 1930 - Manhattan, NYC nung 1buba red & green traffic light amenok.
- 1936 - Adolf Hitler-i Ferdinand Porsche indang "Volkswagen" metetpelatsü.
- 1947 - 4th Golden Globes: "The Best Years of Our Lives" atema Gregory Peck aser Rosalind Russell nati award angu.
- 1970 - Beatles-i "Beatles Again" aka "Hey Jude" kensep saya.

SUDOKU # 5777

	8	3			2					
		9	4			6				
5			9			3				
1			8				3	2		
6		2		3	4					
4			5	2			6	7		
3	7	1	2							
9	2					7	4			
8			1	6						

TELANGZÜBA # 5776

	3	9	5	4	2	6	7	8	1
	8	4	7	9	1	5	3	6	2
5		2	1	6	3	7	8	5	9
1		5	2	3	1	4	9	6	7
6		7	6	1	2	8	3	4	5
4		9	8	4	5	6	7	2	1
3	7	1	2						
9	2					4	7	2	6
8			1	6			6	3	9

OJANG LUTEP # 5323

- ZÜALING :
- TSGTTONETÜ :
- EMATA :
- ANMERGA :
- ÜBAINYAKTS :
- KDA :
- KAALA :
- NGTAA :
- LANENMG :
- ALMI :

OJANG LUTEP TELANGZÜBA # 5322

NISUNG TSÜNGDA TENÜKMEREM ALIBA AJANGA TAJUNG AJAK TAMAJUNG KÜMA NGÜDAKTSÜR

TAN HOPTA ATEMA - KOMA SÜLA ?

Q. Ao oshi renloktsü atema Aor kibongtem nung teyaritepertem tangar kin nungi masü Aotsür Aortem dang ayu nunga koma süla?



Kolkata, February 25, 2021: Centre sorkari gari totzü nung jenjang maneni atuba aser LPG jenjang atuba anema Brihostibarnü West Bengal Chief Minister, Mamata Banerjee-i Centre anema longkak aita electric scooter nung mener Nabanna (State Secretariat)-i aoba noksa nung angur. Kasa noksa nung Kolkata Mayor, Firhad Hakim-i scooter aniba angur.

Subsidised aser Non-Subsidised LPG cylinder shia sen 25 tuogo

New Delhi, February 25 (Agencies): Brihostibarnü India nung LPG jenjang tua Subsidised aser Non-Subsidised LPG cylinder shia sen 25 tuogo.

International jenjang atuba den külemi India linük nunga tan ita tang agi tasembenbuba LPG jenjang atur.

Jenang atuba sülen tang Delhi nung seret 14.2 gas cylinder nung sen 794 kümogo (sen 769 liasü), ta linük meyong fuel retailers-i metetdaksü.

LPG ya linük tesem ajaklen

jenjang ka dang, ajisüaka sorkari teshimtet customers nem subsidized rate nung agütsür.

Ajisüaka tesüiba küm ana tsüngda jenjang kanga atuba agi yimti tulutem nungbo subsidy anenogo, anungji Delhi ama yimtitem nungbo customer nem subsidy magütsür aser ajaki cylinder shia sen 794 agi alitsüsa akümer.

Totzü company nung tongti ketdangser kati ashiba agi, khu abenba taa tali agütsüba ajanga jenjang tali atuba agi kanga

tezülen aliba tesemtem nungbo customers nem subsidy agütsür.

Tan ita February 4 nü cylinder shia sen 25 atu aser February 15 nü cylinder shia sen 50 tua liasü aser tang tesüsa cylinder shia sen 25 tuogo.

Yaküm December ita nungi tenzüka tang tashi nung cylinder shia sen 150 tuogo.

Ajisüaka tesüiba anogo ana tashi petrol aser diesel bo jenjang matu. Tang Delhi nung Petrol litre nung sen 90.93 aser diesel litre nung sen 81.32 agi ayoker.

EC-i Bengal aser TN semdanga election atema terenemshiba asadangtsü

New Delhi, Tsüklai/February 25 (Agencies): Taruba anogo ishika tsüngda Chief Election Commissioner, Sunil Arora aser Election Commissioners- Sushil Chandra aser Rajiv Kumar nungeri West Bengal aser Tamil Nadu na semdanga assembly election agitsü atema terenemshiba jenjang asadangtsü.

EC-i West Bengal nung talisa tensa asadangtsü aser Tamil Nadu nung voters nem

sen lemstüba indang asadangtsü, ta ketdangser kati metetdaksü.

Election Commission-isa March 2, 2021 nü Revenue secretary, Central Board of Direct Taxes (CBDT) Chairman, Central Board of Indirect Taxes and Customs (CBIC) Chairman aser Financial Intelligence Unit-India (FIU-India) Director nunger den senden mena assembly elections agitsü aliba state tem-

Assam, West

Bengal, Tamil Nadu, Kerala aser UT- Puducherry nung election mapang voters mesüzüksü atema sen amshiba, yi amshiba, temesepba mozü amshiba aser osettsüset balala lemstüba nokdangtsü atema o lemteptsü.

January aser February ita tetenzüklen-a EC-i West Bengal aser Tamil Nadu na semdanga election atema terenemshiba asadanga liasü.

EC-i Assam, Tamil Nadu aser Puducherry-a semdangogo.



Amravati, February 25, 2021: Maharashtra nung coronavirus wara tali prokba anema tenokdangbatem benokba sülen Brihostibarnü Amravati nung yimti-yimdong kanga azüngmeyaka aliba noksa nung angur.

India aser Pakistan nati Ceasefire tezüngzüktep beshitsü bangjem

New Delhi, February 25 (Agencies): Pakistan aser India nati Line of Control (LoC) nung ceasefire dak sendakba tezüngzüktep ajak beshitsü atema bangjemogo, ta Brihostibarnü Pakistan Army temi osang ka ajanga metetdaksü.

Brihostibarnü Islamabad aser New Delhi na nung linük anati külem sangdong ka ajanga, linük ana senden nung LoC aser sectors ajak nung tensa asadanga mapang tebilemba ajak lemsatepa jembiogo, ta metetdaksü.

India aser Pakistan naprongla nungi Director Generals of Military Operations (DGMOs) senden amenba mapang nung tezüngzüktep agia alibatem indang o lemtep, ta Pakistan military media wing-Inter-Services Public Relations (ISPR)-i metetdaksü.

"Linük anaprong ajanzüksü aser arrtsülen tesünep alitsü atema DGMOs anapronglai


tensa raksaba aser raraba tebilemtsü dak sendakba onüktem bentettsü atema inyaksü bangjem," ta külem sangdong nung shia lir.

"February 24/25 ayaterm nungi linük anapronglai tezüngzüktep agia aliba ajak beshitsü aser Line of Control den tanga sectors ajak nung ceasefire alitsü atema bangjemogo," ta külem sangdong nungsa shia lir.

1987 küm nungi India aser Pakistan nati hotline level kübok mapang shia tongtepratepa arur. Iba inyakyim kübok linük anaprongla nungi DGMOs-i tongteprateper aser senden amener, ta Pakistan army otongdar, Maj Gen Babar Iftikhar-i metetdaksü.

Paisa, 2014 küm nungi LOC nung ceasefire ozüing alema inyakba bulua kümogo, ajisüaka DGMO anapronglai 2003 küm agiba tezüngzüktep shidak beshitsü lemteogo, ta ashi.

(Maneni tapak 9 nung...)



Gumla, February 25, 2021: Brihostibarnü Jharkhand kübok Gumla district nung telungpurtemi CRPF sepai ana yirutsüba sülen security sepaitemi Kairgani arem nung telungpurtem mita aoba noksa nung angur.

GST aser totzü jenjang atuba anema CAIT-i tanü longkak aiter

New Delhi, February 25 (Agencies): Confederation of All India Traders (CAIT)-i February 26 nü GST anema longkak aitba sentong ka ayongzük aser ibaji pusemtsü atema trade associations 40,000 dak temai telemtetba agiogo; trade unions 40,000 nungji linük nung shishilembar crore 8 shi lir. Parnoki goods and services tax (GST) nung aliba ozüingtem reprangshitsü mepishir.

All India Transporters Welfare Association (AITWA)-ia CAIT pusema Bharat Bandh nung shilem agitsü aser new E-Way Bill agienang ta takhangba agütsütsü.

AITWA National Tir, Mahendra Arya-i, "Totzü jenjang atuba anema aser India sorkari benokba E-way bill ozüingtem agienang ta takhangba agüja state level-transport associations ajaki AITWA pusema anogo ka gari mesenzütsü telemtetba agiogo," ta metetdaksü.

"AITWA-i E-way bill agientsü akhanger, kechiyong saru magütsüba nokdangtsü atema tawa benokba E-invoice inyakyim ya junger. Sorkari Fast Tag connectivity nungi E-invoice amshia garitem track

asütsü akok," ta Arya-i ashi.

"Diesel jenjang ajemtsüla aser tarutsü nung ozüingtem yanglutsü atema o lemteptsüla. Linük tesem ajaklen diesel jenjang liromedemtsüla," ta pai ashi.

Amongnü CAIT-i shidi ka ajanga Ato kilonser, Narendra Modi dang GST inyakyim dak sendakba tebilemtsütem lemsatepa liasü.

CAIT-i Ato kilonser dang GST inyakyim reprangshitsü atema "special working group" ka tentettsüla, aser iba telok nungji tongti ketdangsertem, CAIT nungi züingsemtem aser saru dak sendakba mongintem adentsüla, ta metetdaksü.

Taoba hopta CAIT-i, February 26 nü linük tesem ajaklen tesem 1,500 nung longkak aita Centre sorkar, state sorkartem aser GST Council dang GST nung ozüing tesashitem agienang, ta takhangba agütsütsü, ta metetdakja liasü.

CAIT Secretary-General, Praveen Khandelwal-i, "Linük tesem ajaklen commercial markets ajak shibangtsü aser state ajak nung yimtitem nung longkak aittsü," ta metetdakja liasü

Indonesia hon atoba tesem anenbang; nisung trok asü



Parigi Moutong Regency, Indonesia kübok Buranga yimtsüng nung anentsüh ka alua hon atortem anenbangba sülen ketdangsürtemi item nisungtem bushiba mapang tangokba noksa nung angur.

Palu, Tsüklai/February 25 (Agencies): Indonesia central Sulawesi province nung ozüng alema hon atoba tesem ka nung anentsüh alua nisung trok asü aser ano ketdangsürtemi bushiba mapang lir, ta timtem nung aliba bushia kumzüker temi Brehostibarnü ashi.

Buranga yimtsüng nung Bodhbar nikongdang anentsüh alua alidak police, mitkartem aser yangji aliba disaster agency ajanga Brehostibarnü hadir aser gol tulutem yok.

Brehostibarnü tashinung iba lendong nungi nisung 15 takum kumzüka lir.

Sulawesi province yimtiba, Palu nung aliba search and rescue agency indang odongtar Fatmawati-i ashiba agi, ano

nisung ka samar bushir. "Sür lia nguteter rongnung kinungbo aser pa kinungsü dena liasü," ta provincial search and rescue agency nung operational head, Andia Sultan-i ashi.

Ozüng alema hon atoba tesem nung tzünglu maneni aruba aser ali tashi maitba ajanga anentsüh ya alu südi, ta ketdangsürtemi ashi.

Indonesia nung ozüng alema mesüra informal mining ya kanga bulua lir, aser lendong aketba tesem nung takum bendanga agütsür inyakba ajanga yangji inyakterem kibong mesür.

Iba amala mining nung anentsüh aluba, zümetsüng adokba aser longpok chirepba ya teti ajangshir. Hon yangluba maparen nung miim aliba

mercury aser cyanide tem tapi agi amshir.

Alima nung hon yangluba shilem asem Indonesia nungi lir. Item ya timba Papua province kübok Grasberg mine nungi adoker, kong sen billion \$40 shi jenjang hon lir ta ashir, aser yangji mapa inyaker nisung 20,000 shi lir.

Sakasa Asia aser Africa nung temelaba melie hon atoba tali akumer.

Intergovernmental Forum on Mining, Minerals, Metals and Sustainable Development ajanga asadangba nung, iba ama tesem nung mapa inyaker ya 1993 küm nisung million trok liasü, aser 2014 küm million 30 aliba angbo million 40 shi lir, ta ashir.

China nung makamait tia samaogo: Tir Xi Jinping

Beijing, Tsüklai/February 25 (Agencies): China nung makamait timtem asoshi raraba nung takok ngua tesüiba küm 40 tsüngda nisung million 770 anitetogo, aser ibai linüki yangluba tesüngmangtsü mapa ka lir, ta Tir Xi Jinping-i Brehostibarnü ashi.

Linük nung poverty alleviation nung takok anguba aser model poverty fighter nem akum agüja sentong ka ayongzüka mapang, alima nung nütsüng yongsük timtiba aliba linük nungi makamait tia samadaksüogo, ta Xi-i ashi. China nung nütsüng yongsük billion 1.4 shi lir.

Xi-i ashiba agi, yimtsüngtem nung makamaiter ajunga jenjang ajungkettsüogo. Anungji UN-i 2030 tashinung makamait samadaksütsü nükjidong ayuba küm 10 matongdang China-i takok ngutetogo, ta pai ashi.

Tesüiba küm ti tsüngda yimtsüng nung makamait jenjang nung alir tatembang nisung million 98.99 tang poverty line kübok alir ajunga makamait jenjang nungi ajungketogo. Tepetzük jenjang nung aliba county 832 prong

asertepetzük jenjang nung aliba yimtsüng 128,000 ya poverty list nungi indokogo, ta pai ashi.

1970s tatemlen temelenshi tenzüka maparen balala amenokba sülen makamait tia nung yimtsüngtem nung alir nisung million 770 tashi temaba jenjangi ajungketogo, ta tang China indang poverty line ajanga sayur, ta pai ashi.

Kasa mapang global poverty reduction nung China shilem 70 dak tema lir, ta China Tir aser ruling Communist Party of China (CPC) indang General Secretary, Xi Jinping-i ashi.

Tir menden agizükba sülen China-i makamaiter ajungkettsü asoshi tesüiba küm ti tsüngda sen billion \$246 indokogo, ta pai ashi.

2012 küm tatemlen Xi Jinping China tir akumba mapang China nung makamait samadaksütsü ya pai sangdongba nükjidong tongtipangtiba liasü. Iba mapang China nung nisung million 100 shi makamaiter aser timba yimdak yimtsüngtem nung liasü.

Makamait tia samaba ya tatembang masü saka takum

tasen, nükla tasen tetenzükdak lir, ta Xi-i Brehostibarnü ashi.

2012 küm tatemlen nungi tang tashinung China nung kibong million 7.9 nung ki yanglushiogo, aser nisung million 9.6 dak tema tesem tajungbalen bushia oa alir, ta pai ashi.

Niger tir inyaksü Mohamed Bazoum shimogo

Yangon, Tsüklai/February 25 (Agencies): Myanmar mitkar busemer kar kotari aser süng aben aser kari lijak aser long amer February 1 nü mitkar tashi amshia sorkar atsüngdokba anema nokdaker den raratep.

Mitkartemi sorkar atsüngdoka civilian sorkar lenir Aung San Suu Kyi aser lar party nungi lenirtem apuba sülen Myanmar nung rongrong tulu adoka lir. November election nung ashikülak mapa inyak, ta tai tonglokja mitkartemi sorkar atsüngdoka liasü.

Iba linük nung hopta asem shi anogoshi amai longkak aita arur, aser kaketshirtema Brehostibarnü Yangon nung longkak aittsü sentong lir.

Saka mitkar anemertem aikabo madenshi lia mitkar busemer nisung 1,000 shi adenshia yimti tiyong nung rally tenzü.

Nisung kari osangnenera amokmeren aser mapang talangka melie rongrong tuluba kuma liasü.

Kotari amer nisung telok kati nisung kar dak züka merenshi aser kari lijak agi akha aser long agi aon. Iba tesem nung nisung ana dak kotari agi atsüngba video nung nguogo.

Yimti tiyong nung aliba hotel ka kima nisung telok kati nisung ka dak kanga mejungi züka merenshi, aser parnok rongnung nisung kabo kotari tulu bena liasü. Lendong agütsürtem ainshiba sülen emergency worker temi azü agi yimbanger alisang ya anepalua liasü, saka pa temang koba jenjang nung aliar memetet.

"Tanü atalokba ajanga kiralongrar ji shirnokar sayuogo. Nüburtemi democracy atema nokdakba parnoki tsübur. Onoki nisung ka kisüngi yimsü asüba anema

yimjung nung maneni longkak aittsü," ta activist Thin Zar Shun Lei Yi-i osangbener dang ashi.

Mitkartem anema longkak aitba aser civil disobedience tenzüka ajanga linük maparen kecha meinyakteti aliba mapang ka nung azüdokshiba ajanga khuret tuluba akumer.

Brehostibarnü police temi Yangon indang university tongtiba campur kishitem shibanga iba campus telung nung aliba kaketshir noklang aika temai longkak aittsü asoshi adoktsü aliba nokdanga liasü.

Mitkar temi sorkar atsüngdokba sülen azüdokshiba nungi lendong tali ajurutsü ta ajiteta Myanmar mitkartemi Facebook aser Instagram amshiba nokdangar, ta Facebook-i ashi.

Saka tang yimsü tesüdak mitkartem nungi iba tenokdangba atema telangzüba agüja mali.

Century tesadang ka shi jakdang mitkartemi indang indanga yimsü asüba anema nokdakba nüburtem pua merenshiba amabo tang mitkartemi meinyaker.

Ketdangsürtemi tashi ajema amshir, ta mitkar tekolakba, General Min Aung Hlaing-i ashi. Ajisüaka longkak aiter asem aser police ka takum samaogo.

Bodhbarnü tashinung democracy busema longkak aitba dak sendakba nung nisung 728 pua parnok anema ken o benokogo mesüra temerenshi agütsüogo, ta nübur temeden asoshi inyakba telok kati ashi.

November 8 election nung ashikülak mapa inyakba atema ashishitepba senzüka yutsüba sülen constitution nung aliba ama sorkar atsüngdok, ta mitkartemi ashir. Saka election commission-ibo election timi agiogo, ta ashir.

(Maneni tapak 9 nung...)



United National Movement party lenir Nika Melia busema Georgia yimtiba, Tbilisi nungi kilometer 20 shi pilar Rustavi nung aliba tsüngten chiokdak tesem ka jakdang Georgia opposition activists tem sentong ka nung adenba mapang tangokba noksa nung angur. Mongulbarnü police temi United National Movement lungbanga iba telok mendenpuba, Nika Melia apuba sülen iba rally ya ayongzüka liasü.

Social Media tim mesüi amshiba azüoktsü sorkari ozüing tasen sangdong



New Delhi, February 25, 2021 (Agencies): Social Media sabang tim mesüi amshiba azüoktsü atema, Brehostibarnü Centre ajanga ozüing tasen sangdongogo. Iba maparen atema Sorkari tajangzük agiba shishilembaba tentetem (firm) dang grievance Officer ka shimtsü asoshi

osang prokba dak sendakba nung aikati ashishitepogo; aser item ajunga asadanga Sorkari temzüing tasen yanglutsür ("soft touch" regulation), ta IT minister Ravi Shankar Prasad-i ashi.

Ozüing tasen nung, social media intermediaries-i grievance officer ka shimtsüla, shibai ghonda 24 tsüingda tashishitsü aketba ken o tem angadanga register asütsüla. Tashishiba agütsürtem India nung alirtem asütsüla aser ita shia aruba 'compliance report' tem social media sabangtem ajanga benoktsü.

Iba temzüing dak sendakba nung ajemdaker Okadak mesüra Sorkari asüingdanga mapang mezüing osang tai proker/aibelenertem Social media sabangtem ajanga metetdaksütsüla.

Quad camera aketba Oppo Reno 5K saya

New Delhi, Tsüklai/February 25, 2021 (Agencies): China nung Oppo-i premium Reno smartphone lineup nung Oppo Reno 5K ta nungja agütsüba smartphone tasen ka bendenlokogo. Iba smartphone tasenba tereprangtsü Oppo Reno 5 5G ama lir, saka Snapdragon 765 SoC melen Qualcomm Snapdragon 750G chipset inoka yanglutsüogo.

Oppo Reno 5K nung quad rear camera, 4,300mAh battery aser December 2020 China nung mezüing sayaba vanilla Oppo Reno 5 5G ama OLED display keta aliba angutsü. India nung, Reno 5 series nungi Oppo Reno5 Pro 5G tasenba yokdar.

Company ajanga Oppo Reno 5K jenjang memetetdaksü, saka iba

smartphone ya storage option ana - 8GB RAM + 128GB aser 12GB RAM + 256GB nung angutsü. China nung, iba smartphone ya March 06, 2021 nungi tenzüka Green Breeze, Midnight Black aser Starry Dream sentü nung angutsü. Taoba mapang, Oppo-i Oppo Reno 5 5G sayaba ajaki jangjaa lir. Iba smartphone variant 8GB RAM + 128GB jenjang CNY 2,699 (sen 30,300) aser 12GB RAM + 256GB storage variant jenjang CNY 2,999 (sen 33,700) alitsü. Tang tashi nungbo, Oppo Reno 5K smartphone tanga shishilembadak ayoktsü asoshi company ajanga osang tejangja ka magütsüi lir.

Oppo Reno 5K aser Oppo Reno 5 5G tereprangtsü aser

feature shilem timbaka kasa alitsü. 5K nung 6.43-inch full-HD+ (1,080x2,400 pixels) OLED display den 90Hz refresh rate aser Android 11 den ColorOS 11.1 keta aliba angutsü. Iba smartphone inyakym octa-core Qualcomm Snapdragon 750G chipset den Adreno 619 GPU aser 12GB LPDDR4x RAM ajanga achaayangtsür.

Oppo Reno 5K nung 4,300mAh dual-cell battery keta lir, koba ajanga SuperVOOC 2.0, SuperVOOC, VOOC 3.0, PD aser QC fast charging support asür. Tanga feature tsütsü reprangdanga, iba smartphone nung 5G, 4G LTE, Wi-Fi 802.11ac, Bluetooth v5.1, GPS/ A-GPS, aser 3.5mm headphone jack dena lir.

'The Mothership' nung Halle Berry-i shilem agitsü

Los Angeles, Tsüklai/February 25, 2021 (Agencies): Taruba project - 'The Mothership' cast rongnung Halle Berry denogo.

Arishi küm 54 tain actress Halle-i Netflix atema iba sci-fi drama tasenba nung shilem agiba den külemi executive producer ama inyaktsü.

The Mothership film ya Sara Morse (Berry) kinungbo samar sülen küm ka süia aodang parnok aliba kidang kodanga mengudanga ka ataloker aser lar tanurtem anidener la kinungbo

bushitsütsü aser tongtibangsa la kinungbo ajungbena samaba kuli tejangja bushitsü tenzüka otsü ka asütsü.

Oscar-nominated screenwriter Matthew Charman-i iba film direct asütsü terenemba lir aser pai film atema script zülutsüogo. Director ka ama film ya Matthew indang mezüing project alitsü.

Fred Berger aser Brian Kavanaugh-Jones nati tena meyong Automatik sabang kübok iba film yanglutsü terenemba lir. Kasa mapang

Halle den külemi Danny Stillman executive producer ama inyaktsü.

Iba film dak alaka, 'X-Men' nung Storm shilem agila Halle-i Roland Emmerich indang sci-fi movie 'Moonfall' nunga shilem agitsü renema lir.

'The Independence Day' director indang film nung Halle den Patrick Wilson aser Charlie Plummer nati külemi shilem agiba angutsü.

Iba film nung Halle-i NASA administrator ka ama shilem agitsü.

Niger tir inyaktsü Mohamed Bazoum...

(Tapak 8 nungi...)

Vote agütsürtem tenüing lepa reprangshiba sülen election tasen agitsü, ta mitkartemi ashir. Aji süaka parnoki tang tashi anogo züingzuka mali saka sorkar atsüingdokba mapang küm ka atema state of emergency sangdonga lir.

Suu Kyi ya dangar den osangtsüsang magiteti linük yimtiba, Naypyitaw nung lar kidang pua yua lir, saka lar

telokibo November election nung takok anguba akhumtsübuttsüla aser züingshitsüla, ta ashir.

Mitkartemi election commission tasen shima election agishitsü merangba ya anendaksütsüla aser yangji shilem agir telok kar danga lira itemji mapa tamajung inyaktsü ajungshir aser yarirtem asütsü, ta democracy activist tejen, Min Ko Naing-i ashi.

Tensa tajungba kumdaksütsü nükjidong nung Association of Southeast Asian Nations (ASEAN) ajanga maparen balala inyaktepba nung election tasen agitsü ya jembir.

United States, Britain aser danga linüktemi Suu Kyi chioka democracy tanaben benoktsü akhanger aser mitkar lenirtem nem tenokdanga karbo agütsüogo.



Lt. Tekatemla Jamir
Mangmetong
Tasoba : 1923
Tasüba : 20/02/2021

Mulungnen

Onoki kanga dang meima aliba ojala asür **Tekatemla Jamitsür**, Mangmetong, Lt. **Imtichujang Alang Imchen** kinungtsü, shrianga aliba mapang nungi tasünü tashi kija aser lokti balala shirnokisa nübu, rongsen aser sarasadem agi nungita yariogo, nenok ajak dang kangasa pelaba iba osang kaket ajanga lemsateper.

Takar Tsüingremi nenok ajak tali moajangma ta aji ozü sarasadem.

Temeim chirnur, semchir aser kinungertem.

MENUNGRA BILEMTETER Asür IMTIYAPANG (26.02.2021)



Kodanga amatsü makokba temeim oba, pungmang ama nai onok toktsür oer küm ka abensar. Ne temeim shisatsü aser sempet tajungtem onok molungjang nung teti lir.

Tanü na iba lima nung meliaka onoki na kanga dang menungra sarasadema amonger.

Temeim kinungtsü, jala, jabaso aser kinungertem

Office of the Waromung Village Council TEPELA LEMSATEPER

Teti dang onoki meima aser akhüm agüja aliba lenir Wb. Dr. Longri, Advisor, National Highway and Treasuries & Account, Govt of Nagaland, pai ozü Waromung yimkong asoshi mapang aser tensa ajak nung lenmang balala nungi teti dang yaria arudagi. Yamaji tanüa tenla tulu agüja tesangwa (Solar light) ozü Waromung yimdong nung peria amenoktsüogo. Pai iba ama nüburtem asoshi mapa tajung inyakba angudang ozü Waromung council-i kangasa pelaba lemsateper. Pa mapa tajung onoki kodanga mamatsü. Tsüingremi pa aser par kibong maneni nüburtem asoshi moajang ta sarasademtsür.

Sd/-
Imnanungsang
Chairman
Village Council Waromung

Sd/-
Moa Longkumer
Secretary
Village Council Waromung

DGM GIRLS HOSTEL Half Nagarjan Dimapur, Nagaland
Near Spirit of Faith Church
Coaching: Maths, Science, Social Science
Contact: 7629876364 / 7642921138

India aser Pakistan...

(Tapak 7 nungi...)

2016 küm Pakistan nung amenoka aliba kiralongrar telok kati Pathankot Air Force base amakba sülen nungi linük ana tesendaktep tamajungba kuma liasü. Iba sülen kiralongrartemisa Uri nung Indian Army camp ka maaka liasü.

February 14, 2020 nü kiralongrartem Pulwama nung CRPF sepai 40 pokseta südaksüba sülen ibaji liasü.

mangyanga India sepaitemi Pakistan nung aliba Jaish-e-Mohammed kiralongrartem training camp ka amakba sülen linük ana tesendaktep ano tamajungba aküm.

2019 küm August ita nung Centre sorkari Jammu & Kashmir nung Arlla 370 agienba sülen union territories ana tentetba ajanga tesendaktep tamajungba kuma liasü.

29buba Inter Club Cricket: A&K Cricket Fraternity aser United Brothers CC nati takok angu

Dimapur, Tsüklai/February 25, 2021 (TYO): Imkongmeren Sports complex kübok tang asaya aliba 29th MDCA Inter Club Cricket Tournament tasemnübuba nung A&K o Mokokchung Guardians aser Musketeers CC o United Brothers CC asayaogo.

Iba asayamung mezüing asaya nung, A&K Cricket Fraternity-i toss koka batting shim, kong parnoki over 20 nung run 160 yanglu aser asayar pungo tashi out süadok. Mokokchung Guardians pur fielding tsütsü tashimaitba aser 'catch' tezüba kar meputeti tsükdaktsüba ajanga A&K team nem run talila agüjadok aser iba den külemi 'extra run' 23 tashi agütsü.

A&K nungi asayar rongnung Menchet-i ball 37 nung run 40 aser Talikaba-i run 35 yanglua liasü. Mokokchung Guardians atema, Mandal-i over pezü nung wicket 2 agia run 28 agütsü aser Moatemshi-i over 4 nung wicket

2 den run 30 agütsü. Tanabuba innings nung, Mokokchung Guardians-i junga asaya tenzüik, saka run 11 agi A&K makok aser over 20 nung wicket 7 out asü. Guardians nungi Rupak-i run 46 aser Talinungsang-i run 28 yanglutet.

Newham-i over 4 nung wicket 3 agi aser run 45 agütsü. Imtichiba-i wicket 2 out sütsü.

Kasa anogo tanabuba asaya nung, United Brothers CC-i wicket 10 agi Musketeers CC tsükdaktsü. Musketeers CC pur mezüing batting asü aser lateta aliba over matemdang, over 11.3 nung asayar ajak (10 wickets) out süa run 37 dang yanglutet. Parnok rongnung Ushiba-i run timtiba (9) yanglua liasü.

United Brothers CC atema Imtitongzuk aser Tajen nati - wicket 3/8 (3 overs) aser wicket 2/7 (2 overs) agi. Tanabuba innings nung United Brothers CC-i ayong ayonga dang over 2 nung iba asaya koktet. United

Brothers nungi Shamphri-i run 37 yanglu aser run 1 ji 'extra' nungi angu. Hokolbarnü, Zungamedem aser asayamung nung mezüing shilem agir telok A&K Cricket Fraternity na tsüingda kanga toktepa asayatsü imlar, kechiyong takoker team Quarter Finals nung asayatsü maangka angutsü. Iba sülen, tanabuba asaya nung MDCA Tournament nung team tajung ana - Brotherhood CC aser Titans CC na asayatsü.

Mokokchung Cricket Tournament nung tang mezüing - 29th MDCA Inter Club Cricket Tournament, Live score ya update asür. Cricket sapurtemi iba asayamung osangtem metettsü atema Google Play store ajanga "Cricheroes" app download asütsü akok.

Tanü asaya yamai alitsü:
8:30 AM - A&K Cricket Fraternity VS Zungamedem
12:00 PM - Brotherhood vs Titans CC

Vijay Hazare Trophy: Assam-i run 84 agi Nagaland kokogo

Dimapur, Tsüklai/February 25, 2021 (TYO): Tang asaya aliba Vijay Hazare Trophy asayamung nung, Brehostibarnü Nagaland aser Assam na asayaogo. Iba asaya Assam-i Nagaland madak run 84 agi takok nguogo.

Toss koka Assam-i batting shim aser over 49.5 nung run 294 yanglur asayar ajak out süadok. Assam team rongnung Sibsankar Roy-i run 106, Gokul Sharma-i run 70, Denish Das-i run 34 aser Rajjakuddin Ahmed-

i run 23 yanglu.

Nagaland team nungi Khrievitso Kense-i wicket 4, Stuart Binny & SS Mundhe nati wicket anana aser Jonathan Rongsen-i wicket ka out sütsü.

Tanabuba innings nung Nagaland team-i over 45.2 nung run 210 dang yanglutet aser asayar ajak out süadok. Nagaland nungi asayar rongnung Chetan Bist-i run 57, SS Mundhe-i run 26, Joshua Ben Ozukum-i run 25, Hem Bahadu Chetri-i run 24,

Sedezhalie Rupreo-i run 21 aser Imliwati Lemtur-i run 20* yanglutet.

Assam bowler rongnung Rajjakuddin Ahmed aser Amlanjyoti Das nati wicket anana out sütsü. Kasa mapang Mukhtar Hussain, Pritam, Abhilah Gogoi, Pallav Kumar Das aser Gokul Sharma nungeri wicket ka ka agi.

Taruba asaya Nagaland aser Manipur tsüingda Honibar (27-02-2021) anepdang @9:00 A.M nungi tenzüka asayatsü.

Champions League: Manchester City-i goal 2-0 agi Borussia akok

Budapest, Tsüklai/February 25, 2021 (Agencies): Premier League table temaba jenjang nung alir telok - Manchester City-i Bodhbarnü Borussia Moenchengladbach madak goal 2-0 agi takok anguba sülen, Champions League quarter-final nung asayatsü jenjang tajungba yangluogo.

Budapest nung Champions League last 16, first leg tie nung Manchester City-i Borussia koka liasü.

Iba asaya mezüing half nung Bernardo Silva-i header' goal ka aser tanabuba half nung Gabriel Jesus-i goal tanabuba idakja asaya akokba ajanga Pep Guardiola'er teloki tetoktepa ajunga nung asaya 19 tashi takok tajung nguua aruogo.

Manchester City nung asayar trok tashi melen aser Deobarnü parnoki goal 1-0 agi Arsenal kokogo. Germany nung Covid-19 dak sendakba nung senzusenbongtsü tenokdangba ajanga iba league shilem timbaka

Hungary nung asayatsü lemet.

Champions League knockout stages nung Gladbach-i mezüing shilem agir alitsü aser iba asaya tenzüikli nungi coach Marco Rose-i Guardiola'er telok den tasiüta asayatsü asoshi ajungshiogo.

Iba asaya nung France nung Alassane Plea-i minute 20buba nung mezüing goal idaktsütsü maangka angu, saka goal meinoktsütet aser mapang tatsüka tsüingda City atema Silva-i minute 29buba nung mezüing goal inoktsü.

Gladbach defence tsütsü Portugal defender Joao Cancelo-i cross ball ka metsüloktsü aser külem asayar Silva kolak agi keeper Yann Sommer adena iba goal idaktsü.

Mezüing half atemtsü minute pungo lia arishi küm 26 tain Cancelo-i City atema goal tanabuba idaktsütsü merandang, saka pai metsüba ball ya goal post nung ondak.

Break sülen, tanabuba half

tenzüikli Gabriel Jesus-i goal ka idaktsütsü teimla nung metsüloktsü, saka Switzerland defender Nico Elvedi-i iba goal nokdangadok.

Asaya ghonda ka ajungdang Plea-isa ano goal ka idaktsütsü merandang, saka Manchester City keeper Ederson adena metsüdok. Iba sülen, City-i ayong ayonga dang Germany club Gladbach amokbang aser minute pungo lir Silva-i goal tanabuba idakja goal ana agi tejakdang aküm.

Cancelo-i metsüba cross ball ka Silva kolak agi I Jesus nokdaka alilen tongoktsü aser pai goal tanabuba inoktsü. Iba asaya akokba den külemi, City-i asaya 19buba atonga takok angur alitsü.

Puskas Arena nung asaya piyong Gladbach-i goal idaktsütsü khen dang merandang aser tamakok anguba ajanga, March 16, 2021 Manchester nung asayatsü atema tebilemstü adoker.

T20: Guptill teyari ajanga New Zealand-i Australia akok

Wellington, Tsüklai/February 25, 2021 (Agencies): Brehostibarnü, Dunedin nung New Zealand aser Australia na tsüingda Twenty20 internationals tanabuba asaya nung New Zealand opener Martin Guptill run asem agi dang century metongtet, saka pai junga asayaba ajanga Kiwis-i T20 asaya tanabuba kokogo.

Christchurch nung team ana tsüingda mezüing T20 asaya New Zealand-i akokba sülen, iba T20 series asaya pungo nung New Zealand pur 2-0 agi Australia tejakdang kümogo.

Guptill-i ball 50 nung run 97 yanglutetba ajanga New Zealand-i over 20 nung run 219 tongtet aser parnok rongnung asayar 7 out süadok.

Tanabuba innings nung, team ana tsüingda kanga toktepa asaya tenzüik, kong over 13buba nung Australia run 113 yanglur alidang New Zealand bowler temi

Mitchell Marsh out suja asayar trokbubab out sütsü. Ajisüaka, Marcus Stoinis aser Daniel Sams nati tesemdanger team atema over ishika temulung agüja asaya aser tenati run 92 (partnership) bendenloktsü.

Asaya atemtsü over ka anünga lia Australia-i run 15 nungdaka liasü, saka James Neesham indang mezüing ball nung Sams (run 41)-i zükloktsüba ball ya deep midwicket boundary nung Glenn Phillips-i ajepzük.

Australia-i iba asaya akoktsü atema tatembangbuba ball ana nung Stoinis (run 78)-i 'six' aser 'four' kaka nungdaka aküm, saka Neesham-i aonba ball ya pai anünglen zükloktsü aser boundary/six menguteti long-on nung Tim Southee-i apu.

Australia team-i over 20 nung run 215 dang yanglutet aser parnok rongnung asayar 8 out süadok.

La Liga: Barcelona-i goal 3-0 agi Elche kokogo

Barcelona, Tsüklai/February 25, 2021 (Agencies): Bodhbarnü, La Liga asayamung nung Barcelona-i goal 3-0 agi Elche kokogo. Barcelona nungi Lionel Messi-i goal ana tashi idaktsüba ajanga telok kanga nungitogo.

Camp Nou nung telok ana tsüingda asayadang, mezüing half tashi Catalans pur kanga mejungi asaya tenzüik, koba tan season Barca nung mezüing ataloker alitsü, saka break sülen, tanabuba half tenzüikli Martin Braithwaite tenüklang agi Messi alilen ball ji yok aser Argentina star yagi indang indanga mezüing goal inoktsü.

Barca, shirnok Deobarnü tesemdanger team Cadiz den goal 1-1 draw nung tembang, parnoki ano goal tanabuba idaktsütsü

maangka angu, kong Frenkie de Jong teyari ajanga minute 69buba nung Messi-i goal tanabuba inoktsü.

Goal ana densema, tan season nung Messi-i league goal 18buba idaktsür alitsü.

Messi-i goal tanabuba idaktsür sülen, tatsüka dang lir Braithwaite teyari ajanga 'Left back' asayasang Jordi Alba-i minute 73buba nung Barcelona atema goal tasembuba idakja parnoki iba asaya goal 3-0 agi koktet. Iba takok ajanga Barcelona pur point 50 tongteta La Liga table nung jenjang tasembuba ajangzükttetogo. Tang, La Liga table nung Atletico Madrid pur point 55 nguua temaba jenjang tongteta lir aser Barca pur point pungo agi Madrid tesülen alitsü.

Tests 100 asayar India nung pacer temrongnung Ishant tanabuba kümogo

Ahmedabad, Tsüklai/February 25 (Agencies): India nung fast bowler temrongnung Test 100 asayar rongnung Pacer Ishant Sharma tanabuba asayar kümogo. England den Narendra Modi Stadium nung Bodhbarnü nungi tenzüka asayaa aliba Test ya pa asoshi Test asaya 100buba lir.

Maneni pa iba alizüing tongtetba India nung bowler temrongnung pezübuba kümogo. Pa dang taoba India captain Kapil Dev sülen lir shiba fast bowler temrongnung Test timba nung asayaa lir. Kasa mapang nung pa India nung rongnung Test 100 asayar 11buba kümogo.

Bowler temrongnung taoba captain Anil Kumble (132), Kapil (131), aser spinner Harbhajan Singh (103) nungeri dang India tenüing nungi Test 100 nung shilem agia lir.

England den tasembuba Test

asaya Ishant-i ball ona tenzüik. Pai pa indang tanabuba over nung Dom Sibley out sütsü.

Asaya nung England-i toss akok aser mezüing bat asütsü shim. India team nung Mohammed Siraj melena Jasprit Bumrah aser Kuldeep Yadav melena Washington Sundar aniokogo. England team nunga Chennai nung tanabuba Test asayar pezü tashi melenogo.

India team: Rohit Sharma, Shubman Gill, Cheteshwar Pujara, Virat Kohli(c), Ajinkya Rahane, Rishabh Pant(w), Washington Sundar, Axar Patel, Ravichandran Ashwin, Ishant Sharma, Jasprit Bumrah

England team: Dominic Sibley, Zak Crawley, Jonny Bairstow, Joe Root(c), Ben Stokes, Ollie Pope, Ben Foakes(w), Jofra Archer, Jack Leach, Stuart Broad, James Anderson.

BILEMDANGANG

"Nükjidong ajak tongtettsüsa ayutsüla."